

- विजयदशमी तिंवार माथे प्रदेश रा न्यारा-न्यारा ठोड़ां रावण दहन अर शस्त्र पूजन समेत केई कार्यक्रम व्हे रिया है।
- मुख्यमंत्री भजन लाल शर्मा भरतपुर दौरा रे दूजे दिन आज विकास कामा री समीक्षा करी-जनसमस्यावां ने बेगा निपटावण रा दिया निर्देश।
- रक्षामंत्री राजनाथ सिंह सीमा सड़क संगठन कानी उं दो हजार दो सौ 36 करोड़ रुपया री लागत उं बणायी ज्यी 75 बुनियादी ढांचा परियोजनावां रो कर्यो उदघाटन।
- प्रदेश मांय बिरखा रो दौर थमण रे साथे ई घणकरी ठोड़ां दिन रा तापमान मांय बढवार।

000

विजयदशमी अर दुर्गापूजा रो तिंवार आज देशभर मांय श्रद्धा अर उमाव रे साथे मनायो जावे। ओ तिंवार बुराई माथे अच्छाई री जीत रा प्रतीक रा रूप मांय मनायो जावे है। राष्ट्रपति द्रौपदी मुर्मु, उपराष्ट्रपति जगदीप धनखड़ अर प्रधानमंत्री नरेंद्र मोदी, राज्यपाल हरिभाऊ बागडे, मुख्यमंत्री भजन लाल शर्मा विजयदशमी माथे शुभकामनावां दी। प्रदेश मांय ई दशहरा रा तिंवार माथे न्यारा-न्यारा धार्मिक अर सांस्कृतिक आयोजन व्हे रह्या है। आज सिंज्या शुभ मुहूर्त मांय बुराई रा प्रतीक रावण, कुंभकरण अर मेघनाद रा पुतळा रो दहन कर्यो जायेला। प्रदेशभर मांय केई ठोड़ां रीत मुजब मेळा ई भरीज्ये। कोटा रा राष्ट्रीय दशहरा मेळा रे तैत आज शानदार शोभाजात्रा निकाली ज्यी। और ब्यौरो म्हारा खबरनवीस उं-

राजधानी जयपुर मांय ई ठोड़-ठोड़ रावण दहन रा आयोजन व्हे रिया है। आदर्श नगर, विद्याधर नगर, मानसरोवर अर प्रताप नगर समेत सौ उं बत्ती ठोड़ां सिंज्या विधिपूर्ण रावण, कुंभकरण अर मेघनाद रा पुतळा रे दहन कर्यो जावे। घणी भीड़ न देखता हिफाजत अर यातायात बंदोबस्त रा करड़ा बंदोबस्त करी ज्यो है। पाली मांय ई बार प्रदूषण रे बिना रावण दहन कार्यक्रम व्हे रियो है। अलवर मांय पुरुषार्थी समाज कानी उं दशहरा पर्व माथे शोभाजात्रा निकाली ज्यी अर दशहरा मैदान मांय रावण दहन कर्यो जावे। झालावाड़, सवाईमाधोपुर अर डीग मांय दशहरा तिंवार माथे न्यारा-न्यारा कार्यक्रम व्हे रिया है। श्रीगंगानगर मांय सुखाड़िया सर्किल माथे रामलीला मैदान मांय रावण, कुम्भकर्ण अर मेघनाद रा पुतळा रा दहन व्ह्यो। वठे ई रिजर्व पुलिस लेण मांय शस्त्र पूजन करी ज्यो। जैसलमेर मांय बीएसएफ रा जवानां मंत्रा रे साथे अस्त्र-शस्त्रां री पूजा करी। भरतपुर मांय चाल री जसवंत नुमाइश अर पशु मेळो परवान माथे है। म्हारा खबरनवीस बतायो के मेळा मांय मेळा होवण दूर-दूर उं लोग पूग रह्या है।

विजयदशमी माथे रीत मुजब केई संगठनां अर न्यारा-न्यारा समाजा कानी उं शस्त्र पूजन कार्यक्रम व्हे रिया है। जयपुर समेत प्रदेश रा न्यारा-न्यारा शहरा मांय राष्ट्रीय स्वयं सेवक संघ कानी उं आज पथ संचलन रा कार्यक्रम करी ज्यो। जयपुर शहर मांय कोई 25 ठोड़ां माथे पथ संचलन व्ह्यो। ई दौरान न्यारा-न्यारा सामाजिक संगठनां फूल बरसा र स्वागत कर्यो। जोधपुर मांय राष्ट्रीय स्वयंसेवक संघ रा थापना दिवस रे मौके एकत्रीकरण अर शस्त्र पूजन कार्यक्रम व्ह्यो। ई मौके केन्द्रीय संस्कृति अर पर्यटन मंत्री गजेन्द्र सिंह शेखावत कह्यो के विजयदशमी रो दिन फगत रावण दहन रो दिन नी है, बल्कि ओ एक संकल्प रो ई दिन है। आज रे दिन समाज मांय मौजूद बुराईयां ने खत्म करण रो संकल्प लेवणो व्हेला। धौलपुर मांय गंगाबाई री बगीची मांय राष्ट्रीय स्वयंसेवक संघ कानी उं शस्त्र पूजन कार्यक्रम व्ह्यो। इण रे पछे शहर मांय पथ संचलन निकाली ज्यो। भीलवाडा मांय ई शहर रा न्यारा-न्यारा मार्गा उं पथ संचलन निकाली ज्यो।

00000

मुख्यमंत्री भजनलाल शर्मा भरतपुर दौरा रे दूजे दिन आज सर्किट हाउस मांय जणसुणवाई करी। ई दौरान जिलाभर उं आया लोगां वां ने आपरी समस्यावां बतायी। लोगां री समस्यावां जाणने मुख्यमंत्री अहलकारां ने वां रा समाधान रा निर्देश दिया। इण रे साथे ई वणां जिला कलेक्ट्रेट सभागार मांय संभाग रा भरतपुर, धौलपुर, करौली, डीग, सवाई माधोपुर जिला रा अहलकारां री बैठक ले र बजट ऐलाणा ने लागू करण रा निर्देश दिया। साथे ही वणा विकास कामा री समीक्षा करी। वणां कह्यो के आमजन री समस्यावां निपटावणो अहलकारां री जिम्मेदारी है। इण उं पैला श्री शर्मा संवारा कैवलादेव राष्ट्रीय उद्यान देखने सुविधावां रो जायजो लियो। मुख्यमंत्री उद्यान मांय पांचना बंधा अर चंबल नदी उं आया पाणी रा बारा मांय चर्चा करी। ई दौरान श्री शर्मा कैवलादेव राष्ट्रीय उद्यान रा विकास न लेर अहलकारां ने जरूरी निर्देश दिया।

0000

रक्षा मंत्री राजनाथ सिंह आज सीमा सड़क संगठन-बीआरओ कानी ऊं दो हजार दौ सौ 36 करोड़ रुपया री लागत ऊं बणायी ज्या 75 बुनियादी ढांचा परियोजनावां रो उद्घाटन कर्यो। सिक्किम मांय रक्षा मंत्री 22 सड़क, 51 पुल अर दो दूजी परियोजनावां रो ई उद्घाटन कर्यो। आं परियोजनावां ऊं अंडमान अर निकोबार द्वीप समूह समेत देश रा 11 सरहदी राज्यां अर केंद्र शासित प्रदेशां मांय काम कर्यो जायेला। ई मौके रक्षा मंत्री राजनाथ सिंह कह्यो के 2014 मांय एनडीए सरकार रे राज मांय आवण ऊं पैला विकास री गति रूक गयी ही अर अगूणी अर सरहदी राज्य विकास रा मौका उं बच्योडा हा।

0000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास कड़ी चलायी जा रही है। इण मांय आज पेश है दूर संचार महकमा कानी उं फायदो दिया जावण सारू उठायी ज्या कदमां री जाणकारी—

0000

प्रदेश मांय चलाया जा रह्या **“शुद्ध आहार— मिलावट पर वार”** अभियान रे तैत जयपुर मांय खाद्य सुरक्षा दल बरोबर खावण री चीजां रा नमूना ले रह्या है। जिला कलेक्टर डॉ. जितेंद्र कुमार सोनी रा निर्देश माथे बणायी ज्यी टीम काले न्यारी-न्यारी दुकानां अर ठिकाणा उं खावण री चीजां रा नमूना लिया। वठे ई मुख्य चिकित्सा अर स्वास्थ्य अहलकार जयपुर द्वितीय री टीम सीतापुरा औद्योगिक हलकां मांय एक ठिकाणा उं शुगर कोटेड सौंफ रो सैंपल लियो, वठे ई दूजा ठोड़ां उं मिर्च, हळदी अर धनिया पाउडर रा सैंपल लिया। आं सगळा नमूना ने जांच सारू प्रयोगशाला भेजा जायेला अर नतीजो मिलण माथे कानूनी कार्यवाही करी जायेला।

00000

प्रदेश मांय बिरखा रो दौर थमण रे साथे ई घणकरी ठोड़ां दिन रा तापमान मांय बढ़वार व्हे री है। लारला चौबीस घंटां मांय राज्य मांय सब उं बत्ती 37 दशमलव 6 डिग्री सेल्सियस बत्ती रो तापमान श्रीगंगानगर अर जैसलमेर मांय दर्ज करी ज्यो अर कमती रो तापमान सीकर रा फतेहपुर मांय 15 दशमलव 7 डिग्री सेल्सियस रिकॉर्ड व्ह्यो। मौसम केन्द्र जयपुर मुजब काले कोटा, उदयपुर, अजमेर अर जोधपुर संभाग मांय कठे-कठे हळकी बिरखा होवण री आस है।

000

लोकसभा अध्यक्ष ओम बिरला जिनेवा मांय अंतर-संसदीय संघ री 149वीं मीटिंग मांय हिस्सो लेवण काले रवाना व्हेला। आ मीटिंग 17 अक्टूबर ताई चालेला। श्री बिरला **“अधिक शांतिपूर्ण और टिकाऊ भविष्य के लिए विज्ञान, प्रौद्योगिकी और नवाचार का उपयोग”** मुद्दा माथे सभा मांय बोलेला। लोकसभा अध्यक्ष संघ री शासी परिषद री बैठकां मांय हिस्सो लेवेला। श्री बिरला 14 अक्टूबर ने जिनेवा मांय प्रवासी भारतीयां ऊं ई मिलेला। नुमाइंदा मंडल मांय राज्यसभा रा उपसभापति हरिवंश, दोन्यू सदनां रा महासचिव अर केई दूजा सांसद भेळा है।

00000

केन्द्र सरकार राजस्थान अर आंध्र प्रदेश मांय गांवाई स्थानीय निकायां ने चालता रोकड बरस सारू पन्द्रहवां वित्त आयोग अनुदान री पैली किश्त मंजूर कर दी है। पंचायती राज मंत्रालय कह्यो है के राजस्थान ने विधिपूरण चुणिज्या 22 पात्र जिला पंचायत, 287 पात्र ब्लॉक पंचायत अर 9 हजार 68 पात्र ग्राम पंचायतां सारू कोई 507 करोड़ रुपया रा बेसिक अनुदान अर कोई 761 करोड़ रुपया रा टाइड ग्रांट मिली है। ई रकम ऊं पंचायतां 29 मदां मांय खेती अर गांवाई रहवास समेत शिक्षा अर स्वच्छता सारू स्थानीय जरूरतां ने पूरा करण मांय सक्षम व्हेला। वठे ई स्वच्छता, खुला मांय शौच मुक्त अर जल प्रबंधन जस्यी खास सेवावां माथे ई इण रकम ने खर्च करी जा सकेला।

00000

विश्व गठिया रोग दिवस माथे आज जागरुकता गतिविधियां व्हे री है। हड्डियां मांय पोषक तत्वां री कमी रा कमी ऊं गठिया या अर्थराइटिस बीमारी होवे है। हड्डी रोग रे प्रति जाग जगावण सारू हर साल 12 अक्टूबर ने ओ दिन मनायो जावे है। ई साल रो मुद्दो **“ज्वॉइंट हैल्थ फॉर आल”** राखी ज्यो है। पर्यावरण असंतुलन अर बदलती जीवन शैली ई रोग रा खास कारणां मांय एक है। गठिया रोग दिवस माथे न्यारा-न्यारा अस्पतालां अर संस्थानां कानी ऊं स्वास्थ्य जांच शिविर ई लगायी ज्या। सवाईमाधोपुर जिला मांय आज न्यारी-न्यारी ठोड़ां माथे गठिया रोग रे प्रति जाग जगावण न लेर संगोष्ठियां व्ही। संगोष्ठी मांय गठिया रोग रा लक्षण इण रा ईलाज अर बचाव माथे जाणकारी दीरीजी। हनुमानगढ़ मांय जिला अस्पताल रा अस्थि रोग विभाग कानी ऊं वॉकथॉन राखी ज्यी।

0000